

**სსიპ - ილია წინამძღვრიშვილის სახელობის საზოგადოებრივ კოლეჯში
უსაფრთხოების უზრუნველყოფისა და პირველადი დახმარების აღმოჩენის წესი**

მუხლი 1. ზოგადი დებულებები

1. წინამდებარე წესი განსაზღვრავს სსიპ - „ილია წინამძღვრიშვილის სახელობის საზოგადოებრივ კოლეჯში“ (შემდგომში - კოლეჯი) უსაფრთხოების უზრუნველყოფისა და პირველადი დახმარების აღმოჩენის მექანიზმებსა და პროცედურას.
2. ამ წესით გათვალისწინებული მექანიზმების განხორციელებაზე პასუხისმგებელია სახანძრო უსაფრთხოების უზრუნველყოფისა და პირველადი დახმარების აღმოჩენაზე დადგენილი წესით დანიშნული პასუხისმგებელი პირი/ები, აგრეთვე კოლეჯის ხელმძღვანელი და თანამშრომლები, რომლებიც ხელმძღვანელობენ საქართველოს კანონმდებლობით, კოლეჯის აქტებითა და წინამდებარე წესით.

მუხლი 2. უსაფრთხოების უზრუნველყოფის ფორმები

1. კოლეჯი უზრუნველყოფს:
 - ა) კოლეჯის კუთვნილი ქონების დაცვას;
 - ბ) სახანძრო უსაფრთხოებას;
 - გ) სამედიცინო დახმარების აღმოჩენას კოლეჯის შენობა-ნაგებობაში და მის ტერიტორიაზე მყოფი ნებისმიერი პირისათვის, რომელიც საჭიროებს აღნიშნულ დახმარებას;
 - დ) კოლეჯის შენობა-ნაგებობაში შეზღუდული შესაძლებლობის მქონე სტუდენტების დახმარებას გადაადგილების დროს (ასეთების არსებობის შემთხვევაში);
 - ე) უსაფრთხოების და წესრიგის დაცვის მექანიზმების არსებობას;
 - ვ) საჭიროების შემთხვევაში შენობაში მყოფთა ევაკუაციას.

მუხლი 3. ხანძარსაწინააღმდეგო უსაფრთხოების უზრუნველყოფა

1. კოლეჯში ყველა სართულზე თვალსაჩინო ადგილას გამოკრულია საევაკუაციო გეგმა, რომლის შესაბამისად საჭიროების შემთხვევაში მოხდება შენობის უსაფრთხო დატოვება;
2. კოლეჯი აღჭურვილია ხანძარსაწინააღმდეგო ინვენტარით (ცეცხლმაქრი, სახანძრო სტენდი), მისი გამოყენების ინსტრუქცია ახსნილია კოლეჯის სტუდენტებისა და პერსონალისათვის;
3. აკრძალულია კოლეჯის შენობაში ადვილად აალებადი, ფეთქებადი და მხუთავი აირების შემცველი ნივთიერებების შეტანა;
4. სახანძრო უსაფრთხოების უზრუნველყოფაზე დადგენილი წესით დანიშნული პასუხისმგებელი პირი/ები, თანამშრომლები, პროფესიული მასწავლებლები და სტუდენტები შენობაში ხანძრის ან წვის ნიშნების (დაკვამლიანება, დამწვრის სუნის, ტემპერატურის აწევის და ა.შ.) აღმოჩენის შემთხვევაში ვალდებული არიან:
 - ა) დაუყოვნებლივ შეატყობინონ ხანძრის გაჩენის შესახებ დაცვას, აგრეთვე კოლეჯის ხელმძღვანელობასა და მორიგე სამსახურებს (სასწრაფო, პატრული და ა.შ.). ამასთან, აუცილებელია დაასახელოს ობიექტის მისამართი, ხანძრის გაჩენის ადგილი, შეატყობინოს თავისი გვარი, სახელი;
 - ბ) არსებული ძალებისა და საშუალებების გამოყენებით დაუყოვნებლივ მიიღონ ზომები ადამიანთა გადასარჩენად, ევაკუაციაში, მატერიალურ ფასეულობათა გადარჩენასა და ხანძრის ჩაქრობაში;

5. სახანძრო უსაფრთხოების უზრუნველყოფის მიზნით შენობაში მყოფი ადმინისტრაციის წევრები ვალდებულია არიან:

ა) საჭიროების შემთხვევაში გამორთონ ელექტროენერგია (გარდა ხანძარსაწინააღმდეგო დაცვის სისტემებისა), შეაჩერონ გადასატანი მოწყობილობების, აგრეგატების, აპარატების მუშაობა, გადაკეტონ ნედლეულის, გაზისა და წყლის კომუნიკაციები, შეაჩერონ ავარიულ და მასთან მომიჯნავე სათავსებში სავენტილაციო სისტემების მუშაობა, შეასრულონ სხვა ღონისძიებები, რომლებიც ხელს შეუწყობს შენობის სათავსებში ხანძრის გავრცელებისა და დაკვამლიანების თავიდან აცილებას;

ბ) შეწყვიტონ შენობაში ყველა სამუშაო გარდა სამუშაოებისა, რომლებიც დაკავშირებულია ხანძრის ლიკვიდაციასთან;

გ) გაიყვანონ საშიში ზონის ფარგლებს გარეთ ყველა მუშაკი, რომელიც არ მონაწილეობს ხანძრის ჩაქრობაში;

დ) სახანძრო დაცვის დანაყოფის მოსვლამდე განახორციელონ ხანძრის ჩაქრობის საერთო ხელმძღვანელობა;

ე) უზრუნველყონ ხანძრის ჩაქრობაში მონაწილეთა მიერ უსაფრთხოების წესების მოთხოვნების დაცვა;

ვ) ხანძრის ჩაქრობასთან ერთად ორგანიზება გაუწიონ მატერიალურ ფასეულობათა ევაკუაციას და დაცვას;

ზ) ორგანიზება გაუწიონ სახანძრო დაცვის დანაყოფების შეხვედრას და მათთვის დახმარების აღმოჩენას ხანძრის კერასთან მისასვლელი უმოკლესი გზების შერჩევაში;

თ) სახანძრო დაცვის დანაყოფის მისვლისთანავე მიაწოდონ ინფორმაცია ხანძრის ჩაქრობის ხელმძღვანელს ობიექტის კონსტრუქციული და ტექნოლოგიური თავისებურებების, მომიჯნავე შენობებისა და ნაგებობების შესახებ, შენახული დ გამოსაყენებელი ნივთიერებების, მასალების, ნაწარმის რაოდენობასა და ხანძარსაში თვისებებზე და ხანძრის წარმატებით ლიკვიდაციისთვის საჭირო სხვა მონაცემებზე, აგრეთვე გაუწიოს ორგანიზება ობიექტის ძალებისა და საშუალებების ჩაბმას ხანძრის ჩაქრობასთან დაკავშირებული აუცილებელი ღონისძიებების განხორციელებაში.

6. ევაკუაციის ნიშანის შემთხვევაში ადგილზე მყოფი კოლეჯის თანამშრომლები იკავებენ მდგომარეობას უახლოეს გასასვლელებთან და მეთვალყურეობენ ევაკუაციის მიმდინარეობას.

მუხლი 4. სამედიცინო დახმარების აღმოჩენის უზრუნველყოფა

1. იმ შემთხვევაში, თუ კოლეჯს არ გააჩნია კომპეტენცია, სამედიცინო დახმარება გაუწიოს კოლეჯის სტუდენტებს/პერსონალს, სამედიცინო დახმარების აღმოჩენის უზრუნველსაყოფად, ოპერატიულად იქნება გამოძახებული სასწრაფო დახმარება.

2. სამედიცინო დახმარების აღმოჩენის მექანიზმები:

ა) სტუდენტებსა და კოლეჯის თანამშრომლებს უფლება აქვთ ნებისმიერ დროს მიმართონ კოლეჯის მედდას და მიიღონ შესაბამისი კონსულტაცია ან სამედიცინო დახმარება.

ბ) თუ სტუდენტი ან კოლეჯის თანამშრომელი ვერ ახერხებს კოლეჯის მედდასთან დამოუკიდებლად მისვლას, ამის შესახებ დაუყოვნებლივ უნდა ეცნობოს კოლეჯის მედდას, დაცვის სამსახურს ან ადმინისტრაციას, რომლებიც ვალდებული არიან მიიყვანონ ეს პიროვნება სამედიცინო პუნქტთან.

გ) თუ სტუდენტის ან კოლეჯის თანამშრომლის ჯანმრთელობის მდგომარეობის სირთულიდან გამომდინარე ეჭვქვეშ დგება მისი გადაადგილების უსაფრთხოება, კოლეჯში მყოფ ნებისმიერ პირს უფლება აქვს აცნობოს კოლეჯის მედდას და სთხოვოს მას ავადმყოფის ადგილზე გასინჯვა. კოლეჯის მედდა ვალდებულია დააკმაყოფილოს ეს თხოვნა.

დ) აუცილებლობის შემთხვევაში კოლეჯის მედდამ დაუყოვნებლივ უნდა გამოიძახოს სასწრაფო დახმარება და საჭიროების შემთხვევაში სხვა სამსახურები (პოლიცია და ა.შ).

ე) სასწრაფო სამედიცინო დახმარების სამსახურის გამოძახებისას, კოლეჯის მედდამ ოპერატორს უნდა მიაწოდოს ზუსტი ინფორმაცია, კერძოდ:

- ე.ა. საკუთარი ტელეფონის ნომერი;
- ე.ბ. კოლეჯის მისამართი;
- ე.გ. ინფორმაცია შემთხვევის შესახებ;
- ე.დ. დაზარალებულთა რაოდენობა, სქესი, ასაკი და ზოგადი მდგომარეობა;
- ე.ე ნებისმიერი სხვა საჭირო ინფორმაცია.

3. კოლეჯის მედდის ძირითადი ფუნქციებია:

- ა) კოლეჯის პერსონალისა და სტუდენტებისთვის უსასყიდლოდ პირველადი სამედიცინო დახმარების აღმოჩენა;
- ბ) კოლეჯის პერსონალისა და სტუდენტებისთვის თავისი კომპეტენციის ფარგლებში უსასყიდლოდ კონსულტაციის გაწევა;
- გ) კოლეჯში ცხოვრების ჯანსაღი წესის დანერგვის ხელშეწყობა;
- დ) შესაძლებლობის ფარგლებში აუცილებელი ღონისძიებების გატარება დაავადებათა გავრცელების თავიდან აცილების მიზნით.
- ე) ამ ამოცანების ეფექტურად შესრულების მიზნით, კოლეჯის მედდას გამოყოფილი აქვს სათანადო ინვენტარითა და მედიკამენტებით აღჭურვილი ოთახი. ოთახში არის ყველა საჭირო ინვენტარი და პირველადი დახმარებისათვის აუცილებელი სხვადასხვა სამკურნალო საშუალებები.

მუხლი 5. უსაფრთხოების და წესრიგის დაცვის მექანიზმები

1. კოლეჯის შესაბამისი პასუხისმგებელი პირი/ები ვალდებული არიან მუდმივად აკონტროლონ კოლეჯში კორიდორები და დარღვევის აღმოჩენის შემთხვევაში დაუყოვნებლივ აღმოფხვრან იგი.
2. კოლეჯის შენობაში შესვლა დასაშვებია საშვით (ასეთის არსებობის შემთხვევაში). დაცვის თანამშრომლები ვალდებული არიან გადასცენ საშვი ან/და შეუშვან შენობაში სტუმარი მხოლოდ პირადობის ან მართვის მოწმობის მონაცემების წარდგენის საფუძველზე და შესაბამის ჟურნალში მიუთითონ:
 - ა) სტუმრის სახელი და გვარი;
 - ბ) დამხვედრი/საშვის დამშვეები თანამშრომელი;
 - გ) კოლეჯში შემოსვლის თარიღი და დრო.
3. სტუმრის პირადობის დამადასტურებელი მოწმობა რჩება დაცვის თანამშრომელთან მანამ, სანამ პიროვნება კოლეჯის შენობას არ დატოვებს.
4. სტუმარი ვალდებულია საშვზე ხელი მოაწერინოს კოლეჯის თანამშრომელს, ვისთანაც იმყოფებოდა იგი.
5. ყველა სტუდენტი ვალდებულია თან იქონიოს პირადობის მოწმობა ან სხვა მაიდენტიფიცირებელი დოკუმენტი და მოთხოვნის შემთხვევაში, წარუდგინოს დაცვის თანამშრომლებს კოლეჯში შესვლისას. სხვა შემთხვევაში იდენტიფიცირება ხდება ადმინისტრაციაში მონაცემთა ბაზის მეშვეობით.
6. სტუდენტის მხრიდან ეთიკის კოდექსის დარღვევის შემთხვევაში (ჩხუბი, კოლეჯის ინვენტარის დაზიანება, წესრიგის დარღვევა, უხამსი საქციელი, ბილწსიტყვაობა და სხვა) დაცვის თანამშრომელი, რომელმაც აღმოაჩინა დარღვევა, ადმინისტრაციის შესაბამის უფლებამოსილ თანამშრომელთან ერთად ადგენს ოქმს, სადაც აღწერილია დარღვევის არსი, დამრღვევის მონაცემები (გვარი, სახელი, პირადი ნომერი, სპეციალობა, ჯგუფი), დამრღვევის ახსნა-განმარტება. შედგენილი ოქმი განსახილველად გადაეცემა დისციპლინურ კომისიას, რომელიც ხელმძღვანელობს კოლეჯის შინაგანაწესით/ეთიკის კოდექსით.

მუხლი 6. გარდამავალი დებულებანი

1. კოლეჯს აქვს უფლება უსაფრთხოების დასაცავად განახორციელოს ისეთი ქმედება, რაც ამ წესით არ არის განსაზღვრული, რომელიც უნდა შეესაბამებოდეს საქართველოს მოქმედ კანონმდებლობასა და დამდგარ ფაქტობრივ მდგომარეობას, რომლის გამოც საჭირო გახდება ასეთი წესების გამოყენება.

მუხლი 7. დასკვნითი დებულებანი

1. ამ წესს ბრძანებით ამტკიცებს კოლეჯის დირექტორი.
2. ამ წესში ცვლილებების და/ან დამატებების შეტანა ხდება კოლეჯის დირექტორის ბრძანებით.

ცეცხლმაქრის გამოყენების ინსტრუქცია



საჭირო ნომრები:

გადაუდებელ და საგანგებო სიტუაციებში დახმარების გამოძახების ერთიანი სატელეფონო ნომერია 112

„112“ არის 24-საათიანი საგანგებო სიტუაციების მართვის ცენტრი, სადაც ყველას შეუძლია დარეკოს გადაუდებელი დახმარების მისაღებად.

„112“-ზე დარეკვა შესაძლებელია ნებისმიერი სახის ტელეფონიდან, სახლის ტელეფონიდანაც და მობილურიდანაც. **112-ზე დარეკვა უფასოა.**

112-ზე დარეკვისას ისაუბრეთ გარკვევით და მშვიდად უთხარით ოპერატორს თქვენი სახელი და ადგილსამყოფელი. არ დაკიდოთ ყურმილი პირველმა.

ვებ-გვერდი: www.112.ge

როგორ მოვიქცეთ ხანძრის დროს

ცეცხლის კერის დანახვისთანავე დაუყოვნებლივ დატოვეთ შენობა ან შეეცადეთ ჩააქროთ ცეცხლი. საჭიროების შემთხვევაში ისარგებლეთ საევაკუაციო გასასვლელით.

თუ გადაწყვეტს, რომ არ დატოვოთ შენობა და თავად შეებრძოლო ცეცხლს, მაშინ აუცილებელია დაიცვათ შემდეგი მოთხოვნები:

1. თუ თვლით, რომ ცეცხლთან გამკლავება ძნელი იქნება ცეცხლის ჩაქრობის დაწყებამდე აუცილებლად უნდა დარეკოთ სახანძროში;
2. უნდა იცოდეთ ცეცხლმაქრის გამოყენების წესები. თუ წესები არ იცით დაუყოვნებლივ დატოვეთ შენობა.
3. აუცილებლად უნდა შეამოწმოთ არის თუ არა ცეცხლმაქრი სავსე.
4. კოლეჯის დაცვისა და უფლებამოსილი თანამშრომლის მოთხოვნის შემთხვევაში სტუდენტი ვალდებულია დაუყოვნებლივ დატოვოს შენობა.

თუ ხანძრის დროს ვერ ახერხებთ შენობიდან გამოსვლას

1. შედით ყველაზე უსაფრთხო ოთახში, დაკეტეთ კარები და კარებთან დააფინეთ სველი ტილო ან სხვა ნაჭერი ისე, რომ მაქსიმალურად შეზღუდოთ ოთახში კვამლის შემოსვლა;
2. თუ თქვენსა და ცეცხლის კერას შორის არის ერთი ან რამდენიმე კარი, აუცილებლად დაკეტეთ ყველა კარი;
3. იყავით მზად იმისათვის, რომ მოვლენ თქვენს დასახმარებლად და ყური დაუგდეთ შესაბამის სიგნალს.

4. თუ კვამლმა შემოაღწია ოთახში, დაწეკით იატაკზე, ისუნთქეთ მხოლოდ ცხვირით და სუნთქვისას აიფარეთ ცხვირსახოცი ან სხვა ნაჭერი.
5. თუ გადაწყვეტიტე გაიაროთ ცეცხლმოკიდებულ ტერიტორიაზე, აუცილებლად დაიფარეთ წინასწარ თავი და თმები, შეიკავეთ სუნთქვა და იმოძრავეთ შეძლებისდაგვარად სწრაფად. მოძრაობისას ეცადეთ მაქსიმალურად დახუჭოთ თვალები.
6. სსსმ სტუდენტები აუცილებლად უნდა გავიდნენ ყველაზე უსაფრთხო ოთახში და დაელოდონ დახმარებას ან დახმარება სთხოვონ ადმინისტრაციულ პერსონალს.
7. თუ ნახავთ, რომ შენობა ევაკუირებულია ან იქ იმყოფება მხოლოდ ადმინისტრაციული პერსონალი სასწრაფოდ დატოვეთ შენობა. საჭიროების შემთხვევაში ისარგებლეთ საევაკუაციო გასასვლელით.

შენობაში (კოლეჯის შიგნით) გარდა გამოყოფილი ადგილებისა აკრძალულია:

- სიგარეტის მოწევა;
- კუსტარული ელექტროგამათბობლებით ან ელექტროგამაცხელებლებით სარგებლობა;
- ღია ცეცხლით ან ღია ცეცხლის წყაროთი სარგებლობა;
- საწვავის, ზეთის ან სხვა აალებადი ნივთიერებების შენახვა და სარგებლობა;
- კოლეჯის წინამდებარე ტერიტორიასთან მისასვლელი გზების ავტომანქანებით ან სხვა საშუალებებით ჩახერგვა.

კოლეჯის სახანძრო უსაფრთხოების უზრუნველყოფის მიზნით დაცული უნდა იყოს შემდეგი მოთხოვნები:

შენობაში არსებული ხანძარქრობის პირველადი საშუალებები: ცეცხლსაქრობები და სხვა სახანძრო ინვენტარი უნდა იმყოფებოდეს მუდმივად გამართულ მდგომარეობაში.